






تذكار
تقدم



مسرحية الاطفال



مبوكا كوره



تأليف :
عبدالواحد محمد

الفصل الاول

(المنظر عبارة ساحه فريج اوشارع مقابل منزل ام ماجد ويظهر احمد يلعب بالكره لوحده وراشد جالسا ياكل وهو شاب متين وكسول ولا يحب الرياضه .. تدخل مذيعة مرتديه ملابس رياضيه وفي يدها ميكروفون وتطلق صافره)

نرحب بكم احبائنا الاطفال في حلقة جديده من برنامجكم الرياضي نجوم الفريج. (موثر تصفيق). ونحن اليوم في فريج الوكره وبالتحديد امام منزل مجود كوره حيث يمارس مجموعه من نجوم الفريج هوايتهم المفضله من خلال كرة القدم وسوف نحاول ان نلقي الضوء في حلقة برنامجنا اليوم على هؤلاء النجوم - (تطلق صافره وتخرج)

احمد : (يتوقف عن اللعب) اشفيهم الربيع تاخروا وايد اليوم ؟

راشد : (ياكل بشراهه) .. مادري عنهم ..

احمد : رشود .. روح طق الباب على ميود وحمود خلهم ايون

راشد : وليش ماتروح انت .. شنو اشتغل عندك انا

احمد : رشود بسك اكل .. قوم العب معاي ..

راشد : انا ماحب العب كوره

احمد : هاي اللي انت فالح فيه .. البلعه وبس (يدخل ماجد ومحمد مسرعين وكل واحد منهم يرتدي فرده حذاء واحده)

احمد : مجود .. حمود اشفيكم تاخرتوا هالكتر ؟
(ماجد ومحمد ينظران لبعض ويتقابلان وجها بوجه)

ماجد : (صارخا) حمود التمه هات جوتي احسن لك

محمد : (صارخا) مجود كوره اقولك هات الجوتي احسن لك

ماجد : روح زين روح انت مب على كيفك اتضيع جوتيك وتاخذ جوتي ...

محمد : افصح الجوتي مجود لاينشق ترى باشق حلجك

ماجد : شوف ريلك اشطول جنبها ريل بعير ..

محمد : يعني ماتبي تعطيني الجوتي .. براويك الحين
(كل واحد فيهم يحاول خلع الحذاء من رجل الاخر بالقوه)

احمد : يالربع مب الحين وقت هواش على جوتي .. اليوم عندنا تمرين وايد مهم .. هاك حمود خذ جوتي ولاتهاوشون
(احمد يخلع حذاءه ويعطيه لمحمد .. يتوقفان عن العراك)

ماجد : (وهو يرتدي فردة حذاءه) .. احمدو روح حط .. الاقوال واخلونا نبدا التمرين

محمد : صبرياخي اشوي الين ابيون باقي الربع عشان العدد يكمل ونلعب كلنا ...

ماجد : ومن قالك بنلعب الحين .. احنا انحط الاقوال عشان اول
مايجون نلعب ... يلا احمدو روح حط الاقوال ماعليك منه
عشان مايضيع الوقت علينا ...

احمد : اوووووكي .. (يذهب ويسحب قطعتين من الحديد تبدوا
على شكل اهداف مرمى ويضعها في الاماكن المناسبه
بينما تطلق المذيعه الصافره وتدخل على المسرح)

المذيعه : طبعا حبايبي الاطفال الوقت بالنسبه للرياضي عامل مهم
جدا جدا جدا .. سواء وقت التمرين .. وقت الطعام
والاهم طبعا وقت الراحة والنوم .. على هذا الاساس
الوقت في حيات الرياضي ينطبق عليه المثل اللي ايقول .
الوقت كالسيف ان لم تقطعه ...

الجميع : قطعك (تدخل ام ماجد على المسرح فتركل المذيعه
الكره وتصيب ام ماجد في راسها وتهرب)

ام ماجد : حسبي الله عليكم من عيال بعد رديتو تلعبون كوره
اهني. (تاخذ الكره) . انا كم مره قلت لك ياميود انت
وربعك لاتلعبون كوره احذا البيت .. انتوا ماتسمعون
الكلام ...

ماجد : يمه واللي ايسلمج هذي بتكون اخر مره

ام ماجد : لعب كوره عند البيت مافي .. يلا شيلوا شلايكم اشوف
ورحوا العبوا في مكان ثاني

محمد : وين انروح يايمه .. خلينا نلعب اهني احذا البيت
احسن مانروح نلعب في الشوارع وتدعمنا السياير

ام ماجد : يايمه الدوله ماقصرت وسوت لكم ملاعب خاصه حق
لعب الكوره في الفرغان ليش ماتروحون تلعبون فيها ..

ماجد : هناك عيال الدقل يلعبون واحنا مانحب نلعب معاهم لانه
لعبهم خشن واكسرون ...

ام ماجد : بس يايمه اهني مب مكان لعب كوره وانتوا ماخليتوا
شي ماكسرتوه .. يوم كاسرين الليت .. يوم كاسرين
الزرع .. يوم كاسرين ريل العنز .. (ماجد يقلد صوت
العنز فتخاف ام ماجد والجميع يضحك) .. وي وي وي
خرعتني حسبي الله عليك من صبي ...

احمد : الله ايخليج عمتي ام ماجد على شان خاطري خلينا نلعب

ام ماجد : لالا لالا ... مافي لعب اهني يلا مافي لعب

محمد : نועدج عمتي مانلعب اهني مره ثانيه

ماجد : وانشالله من بكره بنروح نلعب في ملعب الفريج

احمد : واللي ايسلمج ياعمتي اخر مره .. (يقبلها على راسها)

ام ماجد : حبتك العافيه ياولدي يااحمد . بس عشان خاطر احمدوا
ولد زليخه باخليكم تلعبون اليوم . يلا عاد العبوا بس
اتحملوا اتكسرون شي ترا ياويلكم ..

الجميع : انشالله يمه ...

ام ماجد : وانت ياراشد ليش ماتلعب معاهم ؟

راشد : عمتي انا ماحب العب كوره .. ولا احب الرياضه

ام ماجد : لكن الرياضه زينه انتشط جسمك واتقويه واتخليك
رشيق وانيق. (تستعرض عضلاتها وتحاول ان تمشي
على المسرح برشاقه). شوفني انا اشلون رشيقه وانيقه
لاني كل يوم اروح اسوي تمارين سويدي على
الكورنيش. (راشد يحاول تقليد ام ماجد). وانت يامال
الضعفه امك اتقول رشود ليل ونهار ماعنده الا زط
ورقاد ...

ماجد : يمه شوفي وزنه اشلون زايد صاير جنه فيل صغير..
(الجميع يضحك وراشد يشعر بالحرج)

راشد : (غاضبا) اوووه عاد لاتقعدون كل يوم تتطنزون علي

ام ماجد : روح زين .. (تدفعه بعيدا وتدخل المنزل .. تدخل
المذيعه) ..

المذيعه : عدل كلامج يا ام ماجد .. الرياضه مو مقتصره على
الاولاد فقط .. حتى الفتيات والنساء لازم ايمارسون
الرياضه علشان ايحافضون على صحتهم ورشاقتهم ..
مثل ام ماجد شفتوها اشلون ماشالله عليها رشيقه
وانيقه .. وووو (يدخل الاداري ومعه مدرب اجنبي
من الجبهه الاخرى للمسرح فتهرب المذيعه)

الاداري : شوف ياكابتن هذي المجموعه اللي قلت لك عنهم
بصراحه لعيبه موهوبين وخصوصا هذا اللي اسمه
مجود كوره واخوه حمود التمه .. ابيك اتشوف لعبهم
واتراقب حركاتهم ولمساتهم الفنيه للكوره واللي يعجبك
منهم ناخذهم النادي عندنا ..

المدرّب : اوووووكي ...

ماجد : احمّدو وين الرّبّع تاخروا وايد ؟

احمد : مادري عنهم قالوا انهم جايين على الطريق .. ليش تاخروا هالكثير الله واعلم ..

محمد : انتوا اشتتظرون الحين .. خلونا نلعب بروحنا الين ايبون ...

ماجد : (يجري بالكراه) اي يلا خلونا نلعب. ونتمرّن الاسبوع الياي عندنا مباراه مهمه مع فريق النجوم. ولا تتسوون انهم اخر مره فازوا علينا

احمد : انشاءالله هالمره بنتمرن عدل وبنكسر روسهم

محمد : وين تتمرن عدل وربّعك للحين ماجاو

ماجد : (يصفر بالصفاره) اوكي خلونا نلعب بروحنا الين ايبوون .

محمد : اشلون تلعب والعدد ناقص ياما جد

ماجد : انلعب رشود .. يلا رشود قوم العب معانه (راشد يكون جالسا وبيده لعبه الكترونيه)

راشد : روح زين انا مب متفرغ لكم ..

ماجد : معلي .. ار اويك يالادعله

محمد : انا من رايبى نلعب واحد ضد واحد واللى ايفوز يستمر
والمغلوب يرتاح ..

ماجد : او كى .. من يبدأ اول شى ؟

محمد : بالعب انا واحمد والفائز يلعب معاك

ماجد : لا مب على كيفك امس انت بديت باللعب اليوم دورى
بنلعب انا واحمد وانت خلك حكم

محمد : انا مالى خص ابى العب اول شى ..

احمد : خلاص لاتهاوشون العبوا انتوا والفائز يلعب معاى

ماجد : مشكور يا احمد .. حبيبى انت (يسلمه الصفاره ويبدا
ماجد ومحمد باللعب واحمد يقوم بالتحكيم بينهم ..
ماجد يستعرض بالكره ويقوم ببعض الحركات الفنيه)

الادارى : شايف هذا اللاعب ياكابتن ... اسمه ماجد لعيب كوره
حياته كلها كوره فى كوره .. حتى ربعه ايسمونه مجود
كوره من كثر ماحب الكوره .. شوف لمساته للكوره اشلون
لاعب فنان .. اشرايك فى هذا اللاعب ياكابتن ؟

المدرّب : قووود .. بصراحه فنان .. لاعب موهوب .. اوووكى

الادارى : تعال معاى ياكابتن ...

محمد : (صارخا) فاول يا حكم .. فاول والله فاول .. الكوره
المست يده (تدخل المذيعه وتطلق الصافره)

المذيعه : كلمة فاول احبائي الاطفال هي عبارته عن مصطلح رياضي يستخدم في لعبة كرة القدم ..والفاول يعني ارتكاب خطأ من لاعب الفريق ضد لاعب الفريق الخصم ويتوجب عليه عقوبته ولكن خارج منطقة الجزاء .. (تطلق الصافره وتخرج .. المجموعه تواصل اللعب بينما يقترب الاداري والمدرّب ويضع المدرّب رجله على الكره في منتصف المسرح والجميع ينظر اليه باستغراب)...

المدرّب : الكوره هذي فاول يا حكم ...

احمد : من انتوا ؟

المدرّب : انتا مجود كوره

الاداري : وانت حمود التمه

ماجد : انتوا من ؟

الاداري : انا اداري في فريق التحدي وهذا مدرّب الفريق

ماجد : تبون تلعون معانه حياكم .. احنا ناقصين نبي حد يلعب معانه ...

المدرّب : احنا مش جايين هون عشان نلعب ...

الاداري : احنا جايين عشان ناخذكم معانه النادي

الاثنان : (بفرح) اشلوووون

الاداري : احنا جايين عشان ناخذكم معانه النادي

ماجد : (بفرح) يعني تبونا نلعب معاكم في النادي

محمد : ياسلام .. مجود احنا بنلعب في النادي

الاداري : اشرايكم ..

الاثنان : احنا موافقين ...

(اضلام + فاصل موسيقي وتفتح الاضاءه مره اخرى
على ديكور عباره عن ملعب كره قدم في نادي التحدي..
(يدخل الفريق بالملابس الرياضيه ويدخل ماجد ومحمد
مع الفريق بالملابس الرسميه .. الثوب والقحفه
واقدامهم حافيه .. يدخل المدرب حاملا في يده الكره)...

المدرّب : يلا شباب .. يلا تمرين يلا (ينتبه لماجد ومحمد) اونووو
وات نس ماجد. كام هير محمد (يدخل الاداري
والمدرّب يتحدّث معه .. ياتي ماجد ومحمد)

الاداري : ماجد.. محمد .. ليش مالبستوا ملابسكم الرياضيه

محمد : انا ماعرف العب بفانيله وهاف ..

الاداري : ليش يامحمد

ماجد : انا ماعرف العب الا بثوب وقحفه ...

ماجد : وانا ماعرف الا حافي

الاداري : ليش ياماجد

ماجد : لي البس الجوتي احس اني مزبوط ولا اقدر اركض

الاداري : وبعدين معاكم .. ياشباب .. انتوا الحين في نادي رياضي
مب في الفريج الوضع اهني يختلف .. واهم شي عندنا
اهني النظام ...

ماجد : ياااه .. انا خلاص تمللت .. كله نظام نظام .ليكون احنا
في مدرسه

الاداري : بالضبط انتوا في مدرسه .. ولكن مدرسه لتعليم كرة القدم

ماجد : يلا حمود نرجع نلعب في الفريج احسن لنا ...

الاداري : اسمع كلامي ياماجد .. اخاف بعدين تندمون .. انتوا
لعيبه موهوبين حرام تدفنون مواهبكم في الشوارع
والفرجان ...

محمد : انا ماحب اللعب في ملعب حشيش ابي اللعب في الشارع

الاداري : وايش تستفيد من اللعب في الشوارع .. غير انك ترجع
البيت ثيابك مشقوقه .. ريلك مجروحه .. ريحتك خايسه

ماجد : واهني ايش نستفيد يعني ؟

الاداري : الفوايد كثيره اهني ياماجد ..

محمد : مثل شنوا يا استاد ؟

الاداري : (يحاول اغرائهم) .. هني راح تلقون كل
الرعايه والاهتمام .. اهني تلقون الشهره .. وسائل
الاعلام تتهافت عليكم من كل مكان ...

ماجد : (يرفع يده) ممكن سوال استاد .. شنوا يعني تتهافت ؟

الاداري : يعني وسائل الاعلام من تلفزيون وصحافه ومجلات
راح تركض وراكم .

محمد : ياسلام يعني بنطلع في التلفزيون وانصير مشهورين

الاداري : طبعا يامحمد

ماجد : وايحطون صورتنا انا واخوي في الجريده مثل مارادونا
ورونالدينو ...

الاداري : اكيد ياماجد .. وبتسكنون في افخم الفلل .. وتاكلون اطيب
الاطعمه .. وتركبون احلى السيارات .. صدقوني
بتعيشون حياه رغيده ..

محمد : (رافعا يده) شنو يعني رغيده استاد ؟

الاداري : يعني بتعيشون في عز واتكون عندكم فلوس .. فلووووس

ماجد : (مقاطعا) ياسلام فلوس .. يعني بتصير عندنا فلوس
ووووايد

الاداري : طبعا ياماجد واتصيرون اغنياء

ماجد : يعني اقدر اشترى سيكل يديد

الاداري : (ضاحكا) .. تقدر تشتري سياره مرسيدس بدال السيكل

محمد : وانا اقدر اشتري جوال كرت هلا

الاداري : تقدر تشتري الثريا يامحمد

محمد : (رافعا يده) شنوا يعني ثريا ؟

الاداري : اوووه... خلوا عنكم الاسئله الزايده الحين واهتموا
بالتمارين وارشادات المدرب .. صدقوني ياشباب من
هذا المكان راتكون انطلاقتكم لعالم النجوميه والاحتراف
يلا شدوا حيلكم ... يلا عشان الاسبوع الجاي راح يبدأ
الدوري واول مباراه لنا بتكون ضد نادي الزعيم ..

ماجد : ياسلام يعني انا بالعب ضد نادي الزعيم

الاداري : انشالله ياماجد .. وابيك اتشد حيلك ياماجد واتسجل
عليهم اهداف ..

ماجد : بتشوف يا استاد اوعدك اسجل ٤ اهداف في مرمي
الزعيم ..

الاداري : بنشوف ياماجد .. المهم الحين روحوا بدلوا ملابسكم
عشان تتمرون .. (يدخل ماجد ومحمد للداخل ويدخل
المدرب من الجبهه الاخرى للمسرح ومعه بعض
اللاعبين ويقومون بحركات تدريبيه)

المدرب : يلا شباب يلا تمرين .. يدخل ماجد ومحمد بالملايس
الرياضيه ويقوم المدرب بتقسيم المجموعه لفريقين
ويطلق صافره .. تدخل المذيعه)

المذيعه : احبائي الاطفال نحن الان في ملعب نادي التحدي الرياضي ويسرنا ان نلتقي باداري الفريق الكابتن فهد بلنتي في البدايه كابتن فهد هل لك ان تحدثنا عن الدور الذي تقومون به في جلب نجوم الفريج الى ناديكم ..

الاداري : والله احنا بصراحه في نادينا يعني نقوم بمجهود كبير من خلال البحث في الفرجان عن لاعبين موهبين وانجيبهم نادينا ومحاولة اكتشاف مواهبهم والتالي الاستفادة من هذي المواهب .. وانا بصراحه احب اوجه الدعوه لكم الانديه الرياضيه انها تحاول تجتهد في البحث عن اللاعبين الهواه وضمهم في النادي ..

المذيعه : المفرق بين اللاعب الهاوي واللاعب المحترف

الاداري : اقولها لج باختصار .. الهوايه تعني الحريه ولكن الاحتراف يعني النظام والالتزام .. (في الجبهه المقابله تحدث مشاده بين المدرب وماجد) عن اذنج لانه صايره هوشه بين الهوايه والاحتراف ..

المذيعه : شكرا للكابتن فهد .. (تخرج)

الاداري : (صارخا) ماجد محمد اشفيكم

ماجد : مانبي نلعب

الاداري : ليش ماتبون تلعبون ؟

ماجد : ليش ايحطني ضد حمود اخوي .. احنا متعودين نلعب مع بعض ..

الاداري : ياماجد هذي تمرين في المباراه انشالله بتلعبون مع بعض
يلا يلا يلا خلو عنكم الدلع وروحو وكمّلوا التمرين ..
(يذهب ماجد ومحمد ويبدان اللعب مع المجموعه)

ماجد : (يمسك الكره بيده صارخا) .. بلنتي .. حرام عليك ياكابتن
هذي بلنتي (المدرب يطلق صافره ..تدخل المذيعه) ..

المذيعه : بلنتي.. ضربة جزاء (تقوم المذيعه بتطبيق الشرح على
ارض الملعب).. البلنتي او ضربة الجزاء هي المخالفه
التي يرتكبها اللاعب ضد لاعب الفريق الخصم داخل
منطقة الجزاء (يطلق المدرب صافرته فتهرب المذيعه
للخارج)

المدرّب : ماجد ليش تمسك الكوره بايدك يلا كمل .. العب حبيبي
العب ..

ماجد : وانا اقول بلنتي يعني بلنتي ...

المدرّب : ماجد انا الحكم هون مش انتة.. يلا يلا روح العب
(يدفعه بعيدا يتدخل محمد)

محمد : هي انت لاتدز اخوي ..(يتعاركون مع المدرّب ويتدخل
الاداري)

الاداري : بس خلاص .. عيب ياشباب

ماجد : مينون هالمدرّب يبي يضربنا

الفصل الثاني

(تبدأ احداث الفصل على ديكور ساحة الفريج امام منزل ام ماجد وهو نفس الديكور الذي كان في الفصل الاول ونرى احمد يداعب الكره وراشد جالسا ياكل .. يجلس احمد بقرب راشد)

احمد : تدري رشود من عقب ماراحو ماجد ومحمد صار اللعب ماله حلاه ..

راشد : مجود وحمود صاروا نجوم الحين من ايكلمهم

احمد : اي والله .. ماجد وايد تغير علينا ..

راشد : اي خلاص كبر راسه علينا .. حتى صاروا مايملون علينا ولا حتى يسالون .. انت ليش مارحت النادي معاهم

احمد : انا ماخذوني النادي

راشد : احسن انك مارحت عشان ماتصير مغرور مثلهم (يدخل ماجد ومحمد)

ماجد : السلام عليكم

احمد : هلا والله .. ميووود حبيبي (يحضنه)

محمد : رشود حبيبي (يحضن راشد)

راشد : زين انكم تذكرتونا

محمد : ومن قال ان احنا نسيناكم

احمد : والله نسيتونا من رحمتوا النادي كبر راسكم علينا

ماجد : افا احنا نقدر ننساكم يالربع .. شخبارك رشود للحين اتزط
اكل ... (يركل الكره) ياسلام من زمان مالعبت في الفريج

راشد : ما عندكم تمرين في النادي اليوم ؟

محمد : احنا طلعلنا من النادي

احمد : افااااا.. ليش طلعتوا

ماجد : خل ايولون .. تمللنا كله تمارين واومر انا ماحب حد يتحكم فيني (يدخل من الجهه الاخرى للمسرح الاداري والمدرّب)

المدرّب : شايف .. رجع يلعب في الشارع مره ثانيه

الاداري : هذا هاوي ياكابتن .. والهاوي لازم اتعرف اشلون تتعامل
معاہ ...

المدرّب : هذا ولد شوارع ما يصلح يلعب في النادي

الاداري : وانا وراهم وراهم .. ماراح اخليهم .. لازم ارجعهم
النادي ... (المذيعه تدخل وتقف في احدى زوايا المسرح
وتطلق صافرتها والمجموعه تعود للعب)

(المذيعه تقوم بالتعليق)

المذيعه: ماجد كوره ينطلق بالكره نحو المرمى.. نعم انه ينطلق نحو المرمى ياسلام ويسجل اللاعب ماجد كوره الهدف الاول ياللروعه انظروا .. اووووه يا للروعه ماجد يذهب الجمهور ويقوم ببعض الحركات النهلوانيه الجميله .. تعبيرا عن الفرحة بتسجيله للهدف .. بينما في الجبهه المقابله محمد يلعب الكره بسرعه ويجري بها ويسجل هدفا .. اووو ياللروعه محمد يسجل هدف التعادل في مرمى ماجد .. نعم جاء الرد سريعا من اللاعب محمد التمهه والذي يحرز هدف التعادل في الوقت القاتل من المباراه ..

راشد : (يصفق بفرح) هيايياي

ماجد : مستانس هاللا

المذيعه : اووووه ياللروعه ماجد يبدوا غاضبا يركل الكره بقوه فتضرب وجه راشد فيقع راشد على الارض والجميع يظن انه يمزح ولكن يبدوا ان راشد قد اصيب اصابه بليغه في وجهه .. لالا ياماجد هذا خروج عن الروح الرياضيه .. احمد يطلق صافره)

المذيعه : اووووه ياللروعه .. الحكم يطلق صافرته ويخرج الكارت الاحمر في وجه اللاعب ماجد .. ويبدوا ماجد مستاءا من قرار الحكم ..

ماجد : ليش تطردني يا حكم ماسويت له شي انا .. رشود قوم .. قوم يلا عاد لاتتدلع علينا ..

المذيعه : ماجد يقترب من راشد ويحاول مساعدته للوقوف

ماجد : رشود اشفيك يلا قوم عاد... رشود قوم كنت اتغشمر
معاك (ماجد يتفحص وجه راشد)

المذيعه : اوووه يا للروعه وجه راشد ملطخا بالدماء.. ماجد
يصاب بالهلع والخوف ويطلب المساعدة من صديقه احمد
فيقوم احمد بمساعدة راشد .. اوووه يا للروعه راشد يبدووا
انه مغشيا عليه ..

احمد : راشد .. ياراشد ... لازم نتصل بالاسعاف يالربع

المذيعه : احمد يتلفت خلفه فلا يجد ماجد .. اوووه يا للروعه
لقد هرب ماجد واخوه محمد من موقع الجريمة

احمد : (يبحث عنهم) ماجد.. محمد وين رحتموا .. (يتصل
بالموبايل) الو .. الاسعاف .. (صوت سيارة اسعاف +
المذيعه تطلق صافره وتهرب من المكان.. اضلام +
فاصل موسيقى قصير وتفتح بقعة ضوء في احدي اركان
المسرح ونرى ماجد ومحمد مختبئين وخائفين)

محمد : شنسوي يامجود الحين .. الدنيا صارت ليل وين انروح

ماجد : مادري انا خايف .. رشود خذوه في سيارة الاسعاف
والله يستر ..

محمد : اكيد الحين بلغوا علينا الشرطه

ماجد : واكيد الشرطه الحين اتدور علينا

محمد : كله منك لو خليتنا في النادي ماصار اللي صار

ماجد : روح زين .. صبح ماعندك سالفه

محمد : المهم الحل الحين .. لي متى انتم منخشين في هالمكان ؟

ماجد : حمود لاتحن انا مب ناقصك

محمد : ميود انا بردان ويوعان .. تعال نرجع البيت احسن لنا

ماجد : اشلون نرجع البيت .. اكيد الشرطه اول مكان بيروحون له بيتنا ..

محمد : (صارخا) زين شوف لنا حل مايصير انتم هالشكل

ماجد : (مقاطعا) اششش .. اسمع صوت حد ياي صوبنا ..
(تمر ٣ نساء من امامهم) حمود انا عندي خوش فكره
معاي بسرعه (يتجهان نحو النساء ويدخلون معهم
خلف الكواليس مع فاصل موسيقي كوميدي وفجاء نسمع
اصوات النساء يصرخن .. يدخل الاداري والمدرّب من
الجهه الاخرى للمسرح)

الاداري : وين راحو.. اشلون ضيعناهم ياكوتش

المدرّب : اي دونت نو .. (يخرج ماجد ومحمد وهم يرتدون
ملابس النساء)

ماجد : السلام عليكم

الاداري : عليكم السلام

محمد : انتوا شتسوون اهني على هالليل ؟

الاداري : (مرتبكا) .. احنا .. احنا كنا رايعين

ماجد : اتحملوا بروحكم ترا في ثنتين حريم عجائز ميانين
شاردين من المستشفى والشرطه اتدور عليهم ..

محمد : ايقولون انهم لابسين ثياب ريايل واي ريال ايشوفونه
يخنقونه .. فمان الله

المدرّب : واتس هابن .. ايش السالفه كابتن فهد ؟

الاداري : مادري شالسالفه .. (تدخل النساء وهن يرددتين ملابس
ماجد ومحمد يخرج الاداري والمدرّب من المسرح
والنساء يجرين خلفهم .. اضلام + فاصل موسيقي ثم
تفتح الاضاءه مره اخرى على صالة منزل ام ماجد ..
ونرى الضابط واقفا ومعه ام ماجد وابنتها نوره)

الضابط : انتي ام ماجد

ام ماجد : اي نعم يا حضرة الضابط

الضابط : (لنوره) وحضرتج

نوره : انا اخته نوره ..

الضابط : وين ولدج ماجد ؟

ام ماجد : (تبكي) .. مادري عنه.. والله يا حضرة الضابط .. من
صارت السالفه وللحين مارجع البيت لاهو ولا اخوه ..

الضابط : اتعرفون الولد اللي اسمه راشد ؟

ام ماجد : اشلون مانعرفه هذي الا ولدنا .. انشالله ايقوم بالسلامه
والله تعبت يا حضرة الضابط كثر ما قولهم خلوا عنكم
هالكوره ماوراها الا المصايب والبلاوي ولا يسمعون
الكلام ..

الضابط : هدي اعصابج يا ام ماجد وانشالله مايصير الا الخير
(لنوره) واكيد اتعرفون الولد اللي اسمه احمد ..

نوره : اينعم هذي بعد انعرفه.. احمد ولد جارنا سالم بن احمد
(يدخل ماجد ومحمد متنكرين في زي امراتان كبيرتان
في السن وترتديان العبايه والنقاب واحذية كرة قدم وقد
تفاجئا بوجود الضابط في المنزل)

ماجد : السلام عليكم

الجميع : عليكم السلام ...

ام ماجد : من انتوا

محمد : احنا . احنا . احنا (متلعثما)

ماجد : انتي منوا ؟

ام ماجد : وي داشين بيتي وتسالوني انتي .. يلا يلا انجلعوا خرده
ماعندي ..

ماجد : ومن قالج نبي فلوس .. شنوا عبالج طرارات احنا

الضابط : انتوا اشتبون بالضبط ..

محمد : اشدعوه ضابط وعصبي ؟

الضابط : انتوا بتكلمون ولا اخذك مركز الشرطه ..

ماجد : بن بن بنتكلم .. احنا بصراحه يايين بخصوص موضوع
ماجد وراشد

ام ماجد : (تهجم عليهم بعنف) .. بشروا شفتوهم .. لقيتوهم .. الله
ايخليكم قولوا وين شفتوهم

ماجد : بالعدال لاتشقين العبايه .. غاليه هذي شاريتها من سوق
الخميس والجمعه ..

نوره : يمه اشوي اشوي عليهم .. حياكم اتفضلوا .. (يدخلان
ومحمد رافعا العبايه ويبدوا الحذاء مكشوفاً من الاسفل
وماجد يهمس له)

ماجد : يالغبي نزل العبايه لاتفضحنا .. جوتيك اييين ..

نوره : (تضحك بخفيه ويبدوا انها قد تعرفت عليهم) .. حياكم
استريحوا اش تشربون ؟

ماجد : انا اشرب قهوه تركش سكر خفيف متوسط ثقيل

نوره : نعم ؟

ماجد : عطيني شاي احمر

نوره : وانتى ايش تشرابين ياخاله ؟

محمد : انا اشرب عصير بونص ..

نوره : شنهوا ؟

محمد : بغيت قلاص ماي فديتج ريحي ناشف

نوره : انشالله ياخاله (تدخل المطبخ)

الضابط : ممكن اعرف ايش معلوماتكم حول القضية ؟

محمد : (باستغراب) قضية ؟

ماجد : اشدعوه السالفه وصلت المحكمه ؟

الضابط : هي ماوصلت لكن اذا استمر الحال على ما هو اكيد
بتوصل .. (تدخل نوره وفي يدها صينييه بها كوب شاي
وكوب عصير)

نوره : اتفضلوا

محمد : مشكوره يابنيتي انشالله في عرسج (تشرب الماء)
نشف ريحنا الضابط ...

ام ماجد : ماقلتولي وين شفتوا ماجد ومحمد ؟

ماجد : احنا الله ايسلمج كنا رايعين الستى انا واختي

ام ماجد : وعيالي شموديهم الستى ؟

ماجد : (صاخا) احنا اللي كنا رايعين انا واختي مب عيالج
(يشرب الشاي)

الضابط : طيب وبعدين

ماجد : وي اشوي اشوي علي خلوني اشرب الشاي .حشى
مايخلون الوحده تشرب كوب شاي ... كملي السالفه اختي

محمد : كنا كاشخين ورايعين الستى .. انا واختي متعودين نكشخ
وانروح الستى نقعد في الكوفي شوب نشرب عصير
بونص ...

الضابط : (صارخا) .. خلصوني وبعدين

محمد : وي وي اقولج عصبي هالضابط .. عصبي

ام ماجد : (تنتبه على احذيتهم) .. وفي حد ايروح الستى سنتر
بجوتي كوره ؟ (ماجد ومحمد يرتبكان)

ماجد : هالا احنا كنا .. سشمه

محمد : احنا الله ايسلمكم .. ك ك ك كنا .. يعني ..

نوره : (تتدخل وتنقذ الموقف) اكيد انتوا اتروحون تمشون على
الكورنيش اتسوون رياضه وعقب اتروحون الستى سنتر

محمد : صح ... ماشالله عليج اشدر اج ؟

نوره : لانه وايد حريم اشوفهم يمشون على الكورنيش لابسين جواتي كوره ..

الضابط : (متملا) المهمكملوا السالفه وبعدين

ماجد : وبعدين الله ايسلمك ياحضرة الضابط ركبنا تكسي ..
واحنا في الطريق التكسي بنجر.. وشفنا العيال يلعبون
نزل راعي التكسي ايصلح التاير وانا واختي رحنا
انشوف الكوره .. احنا انحب الكوره وايد .. تدري
ياحضرة الضابط انا اشجع الرهيب واختي اتشجع
الزعيم .. احنا اصلا من عائله رياضييه ابا عن جد
ابوي الله يرحمه كان ..

الضابط : (مقاطعا) .. يعني انتوا كنتوا في موقع الحدث ؟

ماجد : (يدعي عدم الفهم) .. والله مادري ياحضرة الضابط
شتقول ؟ مب فاهمه قصدك

الضابط : اقصد انكم كنتوا في مكان الجريمة ؟

الاثنان : جريمه (يهمان بالانصراف)

الضابط : تعالوا اهني وين رايعين .. قعدوا مكانكم (يجلسان)

الضابط : تعتقدون ايش اللي خلا ماجد يعتدي على راشد
بالطريقه الوحشيه هذي ؟

ماجد : اشدعوه وحشيه .. انا شفته بعيوني واختي معاي اشلون
شايت الكوره في ويهه راشد .. (يخرج الكره من تحت
العباءه ويضعها على الارض .. ويقومان بتمثيل الموقف
ويركل ماجد الكره في وجه محمد الذي يقع على الارض
بهداوه)

محمد : (يتالم بنعومه) .. اااااااي ..

ماجد : وطلع من خشمه اشوووووية دم .. يعني نقطه وحده

الضابط : تقارير المستشفى اللي عندي اتقول انه راشد عنده كسر
ونزيف في الانف ...

محمد : يمكن سيارة الاسعاف يوم شالوه طاح من يدهم
وانكسر خشمه ..

الضابط : اشلون ؟

ماجد : عاد احنا يوم شفنا السالفه هالشكل وماجد المسكين خاف
قلنا لازم انقولك الحقيقه يا حضرة الضابط

الضابط : اي ماقصرتوا جزاكم الله خير .. وانتي يا ام ماجد اذا
استجد عندج اي شي كلميني على هذا الرقم .. يلا مع
السلامه (يخرج الضابط وام ماجد تسير معه حتى يخرج
من المسرح ونوره تهمس لامها وكأنها تكشف لها الحقيقه
بينما ماجد ومحمد جالسين على الكنبه وهم واضعين
رجل على رجل .. ام ماجد ونوره تقتربان منهم)

ام ماجد : (صارخه) .. نزلوا اريولكم يعل ريولكم الكسر .. ليكون
عبالكم يالسين في بيت ابوكم .. (يفرع ماجد ومحمد
ويهمان بالانصراف) تعالوا وين رايعين .. تعشوا عندنا

الاثنان : صج والله .. (يعودان ويجلسان على الكرسي)

ام ماجد : بل ماصدقوا ...

نوره : (تقترب من ماجد) انتي شسمج ؟

ماجد : انا اسمي حلیمه

نوره : وانتی شسمج

محمد : انا اسمي سليمه

ام ماجد : اي حياكم الله .. اخذوا راحتكم البيت بيتكم .. خلج معاهم
يانوره اروح ابرز لهم العشى .. (فاصل موسيقي
كوميدي وعلى اثره تذهب ام ماجد من خلفهم وتأخذ
عصايه دون ان ينتبها لها وتسحب عنهم العبايات
وتضربهم وهم يهربون للداخل .. اضلام + فاصل
موسيقي .. تفتح بقعة ضوء بها مكتب الضابط ومعه
الاداري والمدرّب)

الضابط : شتقولون ؟ ماجد بريء

الاداري : اي نعم بريء يا حضرة الضابط .. احنا كنا موجودين في
المكان وماجد ماكان يقصد ايعور راشد ...

ماجد : وانا قلت لكم ماسويت شي غلط

نوره : عيل شتسمي اللي سويته ياماجد ؟ ...

ماجد : اسميه لعب كوره يا نوره .تدريين احنا كنا نلعب مع
بعض لازم واحد ايطيح واحد ايتعور واحد ايتكسر بعد
شنسوي هذي الكوره

محمد : لكن انت شت الكوره في ويه راشد بالعماله ياماجد

ماجد : حمود اشفيك علي اليوم .. انت معاي ولا معاها

محمد : انا مع الحق ياخوي ...

نوره : المهم انشاءالله راشد ا يكون بخير.. ولا بيقتون اخوي
ماجد في السجن ..

ام ماجد : انا اقول اتروح ياماجد واتسلم نفسك للشرطه احسن ..

ماجد : اسلم نفسي للشرطه ؟ يمه انتي شتقولين ؟

نوره : اسمع كلام امي ياماجد ترى بعددين تكبر السالفه وتتورطون
كلكم ..

ام ماجد : واحنا مب ناقصين مشاكل يايمه .. لي متى بتم شارد
من الشرطه ..

ماجد : بس انا خايف

نوره : ليش خايف ؟

ماجد : خايف ايقطوني في السجن .. والسجن فيه زهوييه
(بيكي) انا اخاف من الزهوييه يا محمود اناما كنت
اقصدا عور راشد ولاضره وانت كنت معاي
وعارف هالشي.. انا بريء والله العظيم بريء
يرن جرس الباب)

ام ماجد : روجي يمه شوفي من عند الباب .. (نوره تذهب لتفتح
الباب)

محمد : يما وين العشى انا يوعان

ام ماجد : انشالله يمه الحين نوره اتحط لكم العشى
(تدخل نوره على المسرح مسرعه)

نوره : يما الضابط عند الباب ومعاها ريال غريب.. (يرتبك ماجد
ومحمد ويرتديان العبايات ويجلسان على الكرسي)

ام ماجد : حياك اتفضل يا حضرة الضابط
(يدخل الضابط ومعه الاداري)

الضابط : السلام عليكم

الجميع : عليكم السلام

ماجد : المهم احنا انترخص يا ام ماجد

محمد : انشالله بنمر عليكم في وقت ثاني

ام ماجد : وين رايعين ماتبون تتعشون .. (محمد يعود ويجلس)

محمد : اي والله صبح ماتعشنا (يسحبه ماجد)

ماجد : قومي انا تاخرك عيالي في البيت بروحهم مع الخدامه
واخاف ريلي ايهاشني (يهمان بالانصراف فيمسك بهما
الضابط)

الضابط : لحظه لو سمحتوا محتاجينكم اشوي في التحقيق

ماجد : هدني اشفيك .. اقولك متاخره على عيالي ..
(يحاول ماجد ومحمد الافلات من الضابط فيسحب
العبايات من فوق رؤسهم)

الضابط : ماجد .. محمد مافي داعي للهروب احنا عرفنا كل شي
انا ابي اسالكم سوال واحد بس .. ليش سويتوا جدي
ليش شردتوا ياماجد ؟

ماجد : لاني كنت خايف تحبسوني

الضابط : ليش نحبسك .. انت بريء ياماجد الجماعه اشرحوا لي
الموقف وراشد الحمد لله بخير .. وام راشد تنازلت عن
القضيه .. كان المفروض انك ماتشرد واتواجه الموقف
بشجاعه

ام ماجد : طول ما انك ماسويت شي غلط لاتخاف ..

الاداري : وانت انسان رياضي ولاعب موهوب يامجد ولازم
 اتعرف انه الرياضه شجاعه وفن واخلاق.. واللاعب اللي
 يتحلى بالروح والاخلاق الرياضيه الجمهور ايجبه
 ويخرمه

الضابط : انا بصراحه احب اشكركم يا اخوان واشكر وقفكم مع
 ماجد لانكم وضحتوا لنا الحقيقه وعرفنا انه ماجد كان
 بريء وانه ماكان يقصد ياذي راشد ..

الاداري : وانا جد امكم الحين اسمحوا لي اقدم عرض على ماجد
 واخوه محمد انهم ينظمون معانه في النادي .. نادي
 التحدي الرياضي ..

ام ماجد : اشلون .. عيالي يلعبون كوره مره ثانيه لالا لالا
 ان شفتهم ايشوتون كوره عقب اليوم حشيت ريولهم
 حشش ...

الاثنان : صح السانج يا يمه ...

نهاية المسرحيه

٢٠٠٦/١/٢٠

عبدالواحد محمد